



Datë: 08.07.2025  
Numër Protokolli: 5018/2025

A.nr.808/2025

**Këshilli i Pavarur Mbiqëqyrës për Shërbimin Civil të Kosovës**– Kolegji për Shqyrtimin dhe Vendosjen e Ankesave i përbërë nga: Malsore Gashi Bajraktari, kryetare, Eshref Shabani dhe Ardita Haxhnikaj Demi, anëtarë, me Atdhe Gashi, në cilësinë e procesmbajtësit, ka shqyrtuar ankesën me numër A.nr.808/2025, të datës 05.05.2025, të parashtruar nga ankuesi Y.L, të cilin sipas autorizimit e përfaqëson Valentina Kaçandolli-Bekteshi, kundër organit të punësimit: Inspektorati Qendrorë i Punës, në çështjen juridike “*kontestim konkursi*”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafin 3 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbiqëqyrës për Shërbimin Civil të Kosovës, dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbiqëqyrës për Shërbimin Civil të Kosovës, më datë 08.07.2025, mori këtë:

## V E N D I M

**I. Refuzohet si e pabazuar** ankesa me numër A.nr.808/2025, e datës 05.05.2025, të parashtruar nga ankuesi Y.L.

**II. Mbetet në fuqi** Vendimi me numër protokolli 706 i datës 04.04.2025, i U.D Drejtorit Ekzekutiv të Inspektoratit Qendrorë të Punës.

## A r s y e t i m

Ankuesi, Y.L (në *tekstin e mëtejme referuar*: ankuesi), më datë 05.05.2025, përmes përfaqësueses së autorizuar Valentina Kaçandolli-Bekteshi, ka parashtruar ankesë në Këshillin e Pavarur Mbiqëqyrës për Shërbimin Civil të Kosovës, kundër Vendimit me numër protokolli 706, të datës 04.04.2025, i U.D Drejtorit Ekzekutiv të Inspektoratit Qendrorë të Punës.

Këshilli i Pavarur Mbiqëqyrës për Shërbimin Civil të Kosovës (në *tekstin e mëtejme referuar*: Këshilli), bazuar në dispozitat e Ligjit Nr. 06/L-048 për Këshillin e Pavarur Mbiqëqyrës për Shërbimin Civil të Kosovës dhe Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbiqëqyrës për Shërbimin Civil të Kosovës, më datë 21.05.2025 ka dërguar kërkesën për përgjigje në ankesë tek Inspektorati Qendrorë i Punës, ndërsa ky i fundit më datë 20.06.2025, ka dorëzuar përgjigjet në ankesë së bashku me shkresat e bashkangjitura të lëndës.

Tutje, Kryetari i Këshillit, pas pranimit të kërkesës së Kryetares së Kolegjit për Shqyrtimin dhe Vendosjen e Ankesave, me Vendim me numër protokolli 4151/2025, të datës 18.06.2025, ka shtyrë afatin për vendosje të ankesës me numër A.nr.808/2025, të parashtruar nga ankuesi edhe për dhjetë (10) ditë pune.

Kolegji për Shqyrtimin dhe Vendosjen e Ankesave (në *tekstin e mëtejme referuar*: Kolegji i Këshillit) administroi këto prova: Ankesën me numër protokolli 2949/2025 të datës 05.05.2025, të parashtruar

nga ankuesi në Këshillin e Pavarur Mbikëqyrës për Shërbimin Civil të Kosovës; Autorizimin e datës 28.04.2025; Dokument identifikimi; Konkursin me numër reference RN00015427 të datës 11.10.2024; Njoftimin e datës 08.01.2025; Kërkesën për informim; Vendimin me numër protokolli 706, të datës 04.04.2025; Kërkesën për përgjigje në ankesë të datës 21.05.2025; Përgjigjen në ankesë të datës 20.06.2025; Njoftimin me numër protokolli 3107 të datës 27.11.2024; Vendimin me numër protokolli 2734 të datës 11.10.2024; Vendimin me numër protokolli 3171 të datës 04.12.2024; Aplikacionin e ankuesit të datës 24.10.2024, së bashku me dokumentacionin e bashkangjitur për konkursin përkatës; Aplikacionin e kandidatit B.B të datës 19.10.2024, së bashku me dokumentacionin e bashkangjitur për konkursin përkatës; Aplikacionin e kandidates B.D të datës 27.10.2024, së bashku me dokumentacionin e bashkangjitur për konkursin përkatës; Aplikacionin e kandidatit I.G të datës 16.10.2024, së bashku me dokumentacionin e bashkangjitur për konkursin përkatës; Aplikacionin e kandidates V.M-J të datës 15.10.2024, së bashku me dokumentacionin e bashkangjitur për konkursin përkatës; Listën e kandidatëve të aprovuar dhe refuzuar; Formularët e vlerësimit të kandidatit në intervistë të datës 27.12.2024.

Kolegji për Shqyrtimin dhe Vendosjen e Ankesave, pasi ka shqyrtuar të gjitha shkresat e bashkangjitura të lëndës të dërguara nga palët në procedurë, ka konstatuar se ankesa e ankuesit **është e pabazuar**, sepse:

Nga provat e administruara të lëndës rezulton se Inspektorati i Punës, më datë 11.10.2024 ka shpallur Konkursin publik me numër reference RN00015427, për pozitën e punës “Zëdhënës” pranë Zyrës së Kryeinspektorit, ku afati për aplikim ka qenë nga data 12.10.2024 deri më 10.11.2024.

Rrjedhimisht, nga shkresat e lëndës rezulton se në këtë konkurs kanë aplikuar 27 kandidatë, ndërsa prej tyre kriteret e konkursit i kanë plotësuar dhe kanë hyrë në listë të ngushtë 5 kandidatë, në mesin e tyre edhe ankuesi, i cili sipas Njoftimit të datës 01.08.2025, të Njesisë së Burimeve Njerëzore të Inspektoratit Qëndro të Punës, rezulton se ka arritur gjithsejtë 70.8 pikë të përgjithshme nga kjo procedurë rekrutimi dhe si rrjedhojë është shpallur kandidatë fitues pozitën e punës Zëdhënës.

Tutje, U.D Drejtori Ekzekutiv i Inspektoratit Qendrorë të Punës, me Vendimin me numër protokolli 706 të datës 04.04.2025, ka anuluar konkursin me numër reference RN00015427, për pozitën e punës “Zëdhënës”, me arsyetimin se Këshilli i Pavarur Mbikëqyrës për Shërbimin Civil të Kosovës, në arsyetimet e Vendimeve A.nr.166/2025 të datës 07.03.2025, A.nr.01/2025 të datës 18.02.2025, A.nr.144/2025 të datës 27.02.2025, A.nr.07/2025 të datës 18.02.2025, A.nr.42/2025 të datës 07.03.2025, A.nr.2124/2024 të datës 28.02.2025, A.nr.74/2024 të datës 27.02.2025, ka shpallur të jo të ligjshëm Vendimin 2430 të datës 13.09.2024, me të cilin ndër të tjera është shpallur edhe kjo procedurë e rekrutimit.

Ankuesi, në ankesën e parashtruar në Këshillin e Pavarur Mbikëqyrës për Shërbimin Civil të Kosovës, pretendon se Vendimi me numër protokolli 706 të datës 04.04.2025, për anulimin e konkursit e numër reference RN00015427, për pozitën e punës “Zëdhënës”, është i përfshirë me shkelje thelbësore të dispozitave të nenit 4, 6, 7, 47 dhe 48 të Ligjit Nr.05/L-031 për Procedurën e Përgjithshme Administrative, duke theksuar ndër të tjera se më datë 15.04.2025, ka parashtruar kërkesë tek KPMSHCK, për njoftimin se a ka parashtruar ankesë ndonjë nga kundër kandidatet e procedurës përkatëse të rekrutimit, nga e cila është njoftuar se nuk ka pranuar asnjë ankesë, rrjedhimisht i njëjti pretendon procedura e rekrutimit në fjalë nuk mund të anulohet ngase nuk është parashtruar ndonjë ankesë për përzgjedhjen përfundimtare të kandidatëve, ndaj kërkon nga Këshilli aprovimin e ankesës me obligimin që Inspektorati Qendrorë i Punës, ti lëshoj ankuesit Aktin e emërimit.

Kolegji i Këshillit, mbështetur në mandatin kushtetues dhe ligjor lidhur me sigurimin e respektimit të rregullave dhe parimeve që rregullojnë shërbimin civil, ka shqyrtuar në tërësi procedurën e pranimit sipas konkursit me Nr. referencës RN00015427, për pozitën *Zëdhënës* pranë Zyrës së Kryeinspektorit, dhe si rrjedhojë, në bazë të provave materiale të lëndës, konstaton se sipas Vendimit me numër protokolli 2734 të datës 11.10.2024, të nxjerr nga Kryeinspektori i Inspektoratit të Punës, është obliguar Njësia e Burimeve Njerëzore e Inspektoratit të Punës që të bëjë shpalljen dhe zhvillimin e procedurave të rekrutimit për pozitën e lira: Udhëheqës i Divizionit për Statistika, Udhëheqës i Divizionit për Cilësinë e Inspektimeve dhe Standardizimin e Gjobave, Auditor i Brendshëm, *Zëdhënës i Agjencisë* dhe Asistent/e Administrative, ndërsa i njëjti me datë 04.12.2024, ka nxjerrë Vendimi me numër protokolli 3171, për themelimin e Komisionit të Pranimit për vlerësimin profesional të kandidatëve, për pozitën Asistent/e Ekzekutiv/e-RN00015481; *Zëdhënës i Agjencisë-RN00015427* dhe Udhëheqës i Divizionit për Statistika-RN00015477.

Andaj, Kolegji i Këshillit, vlerëson se personi i cili nxjerr vendimin e cekur si më lartë për shpalljen e konkurseve dhe vendimin e cekur si më lartë për themelimin e komisionit të pranimit, gjegjësisht Kryeinspektori i Inspektoratit të Punës, në këtë pozitë pune është emëruar me mandat katër (4) vjeçar, përmes Vendimit Nr.01/79, të nxjerrë nga mbledhja e datës 25.02.2022, e Qeverisë së Republikës së Kosovës. Këshilli i Pavarur Mbikëqyrës për Shërbimin Civil të Kosovës përmes monitorimit të jashtëzakonshëm të bërë në Ministrinë e Financave, Punës dhe Transfereve, lidhur me emërimin e Kryeinspektorit të Inspektoratit të Punës përmes Vendimit Nr.50/2022 të datës 14.07.2022, mbi të cilin akt ishte aprovuar Raporti i Monitorimit të Jashtëzakonshëm në Ministrinë e Financave, Punës dhe Transfereve (*tani e tutje referuar: MFPT*), paraprakisht kishte konstatuar se emërimi i Kryeinspektorit të Inspektoratit të Punës, si pozitë e kategorisë së lartë drejtuese në shërbim civil, pa zhvilluar procedurat e rekrutimit, sipas dispozitave të aplikueshme ligjore gjegjësisht sipas përcaktimeve ligjore të nenit 40 të Ligjit Nr.06/L-114 për Zyrtarët Publikë, është tërësisht i kundërligjshëm, dhe shkel rëndë parimet e pranimit të zyrtarëve publik, të përcaktuara me nenin 6 paragrafi 1, 2 dhe 3 të Ligjit Nr.06/L-114 për Zyrtarët Publik i cili kishte qenë në fuqi asaj kohe, kështu që ishte rekomanduar edhe Kryeministri i Republikës së Kosovës, që me qëllim të kthimit të ligjshmërisë të ndërmarrë të gjitha veprimet e nevojshme ligjore për anulimin e Vendimit Nr.01/79 të datës 25.02.2022, mbi të cilin e kishte emëruar Kryeinspektorin e Inspektoratit të Punës. Ndaj Vendimit Nr.50/2022 të datës 14.07.2022 të Këshillit, ishte hapur konflikt administrativ nga kjo e fundit si institucion që kishte rekomanduar emërimin e Kryeinspektorit në Inspektoratin e Punës, mirëpo Gjykata Themelore në Prishtinë-Departamenti për Çështje Administrative, përmes Aktvendimit me numër A.nr.1892/2022 të datës 22.08.2022 e ka refuzuar kërkesën e palës paditëse Ministrisë së Financave, Punës dhe Transfereve për shtyrjen e ekzekutimit të Vendimit të Këshillit A.nr.50/2022 të datës 14.07.2022, po ashtu kërkesën për shtyrjen e ekzekutimit të Vendimit të Këshillit e kishte refuzuar edhe Gjykata e Apelit të Kosovës-Departamenti për Çështje Administrative përmes Aktvendimit me numër A.A.702/2022 të datës 27.09.2022, ndërsa është vërtetuar Aktvendimi me numër A.nr.1892/2022 i datës 22.08.2022 i Gjykatës Themelore në Prishtinë-Departamentit për Çështje Administrative.

Lidhur me vendosjen e çështjes meritorë sipas padisë së MFPT, Gjykata Themelore në Prishtinë-Departamenti për Çështje Administrative përmes Aktgjykimit A.nr.1892/2022 të datës 14.04.2023 e ka refuzuar padinë e palës paditëse-Ministrisë së Financave, Punës dhe Transfereve nga rrjedh se Vendimi i Këshillit me numër A.nr.50/2022 i datës 14.07.2022 ka mbetur në fuqi pasi që është konstatuar ligjshmëria e tij, kurse po ashtu Gjykata e Apelit e Kosovës-Departamentit për Çështje Administrative përmes Aktgjykimit me numër AA.nr.354/2023 të datës 08.07.2024 e ka refuzuar ankesën e palës paditëse-Ministrisë së Financave, Punës dhe Transfereve duke vërtetuar Aktgjykimin me numër A.nr.1892/2022 të datës 14.04.2023 të Gjykatës Themelore në Prishtinë-

Departamentit për Çështje Administrative. Ministria e Financave, Punës dhe Transfereve kundër Aktgjykimit me numër AA.nr.354/2023 të datës 08.07.2024 të Gjykatës së Apelit të Kosovës- Departamentit për Çështje Administrative, ka parashtuar kërkesë për rishqyrtim të jashtëzakonshëm të vendimit gjyqësor të shkallës së dytë pranë Gjykatës Supreme të Kosovës, ndërsa përmes Aktvendimit me numër ARJ.nr.134/2024 të datës 25.09.2024 Gjykata Supreme e Kosovës e ka hedhur poshtë kërkesën e Ministrisë së Financave, Punës dhe Transfereve.

Mirëpo, pavarësisht rrethanave dhe fakteve të pasqyruara si më lartë se ndaj Vendimit të Këshillit ishte hapur konflikt administrativ, duke marrë për baze faktin se Vendimet e Këshillit ne procedurë administrative janë vendime të formës se prerë, Këshilli lidhur me moszbatimin e Vendimit me numër Nr.50/2022 të datës 14.07.2022 përmes se cilit është konstatuar se emërimi i Kryeinspektorit të Inspektoratit të Punës është bërë në mënyrë të kundërligjshme e ka njoftuar Kryetarin e Kuvendit të Republikës së Kosovës, Kryeministrin e Republikës së Kosovës dhe Kryetarin e Komisionit për Administratë Publike, Pushtet Lokal, Media dhe Zhvillim Rajonal në Kuvendin e Republikës së Kosovës. Po ashtu, në mënyrë shprehimore është njoftuar veçmas edhe Kryetari i Kuvendit të Kosovës përmes shkresës së datës 03.10.2024 lidhur me mos zbatimin e Vendimit të Këshillit me numër Nr.50/2022 të datës 14.07.2022 nga Qeveria e Republikës së Kosovës.

Andaj, nisur nga fakti i pa kontestueshëm se të gjitha instancat gjyqësore të Republikës së Kosovës, kanë vërtetuar Vendimin Nr.50/2022 të datës 14.07.2022 të Këshillit të Pavarur Mbikëqyrës për Shërbimin Civil të Kosovës, me të cilin akt është vërtetuar konstatimi se emërimi i Kryeinspektorit të Inspektoratit Qendrorë të Punës, përmes Vendimit Nr.01/79, të datës 25.02.2022, të Qeverisë së Republikës së Kosovës, është i kundërligjshëm dhe shkel rëndë parimet e pranimit të zyrtarëve publik, dhe se me këtë rast Kolegji i Këshillit konstaton se Vendimi me numër protokolli 2734 i datës 11.10.2024 i nxjerr nga Kryeinspektori i Inspektoratit të Punës për shpalljen e konkurseve të lartë theksuara, rrjedhimisht edhe konkursit për pozitën të cilën ankuesi është shpallur kandidat fitues - *Zëdhënës, me numër referecne RN00015427* dhe Vendimi me numër protokolli 3171 i datës 04.12.2024 për themelimin e Komisionit të Pranimit për vlerësimin profesional të kandidatëve për konkursin përkatës dhe konkuret e lartë theksuara, janë vendimet të pa ligjshme në kuptim të nenit 4 dhe 52 të Ligjit Nr.05/L-031 për Procedurën e Përgjithshme Administrative, i cili përcakton se: Neni 4 [Parimi i ligjshmërisë], ku përcaktohet se: “1. Organet publike veprojnë në përputhje me Kushtetutën, legjislacionin në fuqi, si edhe me rregullat e përgjithshme administrative të zbatueshme brenda kompetencave të tyre dhe në përputhje me qëllimin për të cilat janë dhënë këto kompetenca. 2. Veprimi administrativ që cenon apo mund të cenojë një të drejtë apo interes juridik të një personi, duhet të jetë i autorizuar nga një ligj. 3. Nëse ligji autorizon organin publik të ushtrojë pushtet diskrecionar në një vendimmarrje (në vijim “diskrecioni”), ai do të ushtrohet në mënyrë të ligjshme vetëm nëse plotësohen këto kushte: 3.1. nuk tejkalon kufijtë e përcaktuar në ligjin që lejon diskrecionin; 3.2. zgjedhja e organit publik është bërë vetëm për të arritur qëllimin për të cilin ligji e parashikon diskrecionin dhe është në përputhje me parimet e përgjithshme të këtij Ligji, në veçanti me parimin e proporcionalitetit, dhe 3.3. zgjedhja e organit publik nuk është në kundërshtim me normat e gjithëpranuara të shkencës apo teknikës dhe nuk shkel parimet themelore të drejtësisë apo arsyes njerëzore. 4. Pushteti diskrecionar, përmendur në paragrafin 3 të këtij neni, është mundësia që i jepet një organi publik, shprehimisht apo që nënkuptohet me ligj, për të vendosur duke zgjedhur në mes dy apo më shumë veprimeve të ligjshme, për t’i shërbyer në mënyrën sa më të përshtatshme interesit publik”, Neni 52 [Paligjshmëria e aktit administrativ], ku përcaktohet se: “1. Një akt administrativ është i paligjshëm nëse: 1.1. është nxjerre në mungesë të autorizimit nga një ligj, sipas paragrafit 2 të nenit 4 të këtij Ligji; 1.2. organi publik që e nxjerr ka vepruar pa pasur kompetencë; 1.3. është rezultat i shkeljes të dispozitave lidhur me procedurën administrative; 1.4. është nxjerre në kundërshtim me dispozitat që rregullojnë formën apo elementet e detyrueshme të aktit

*administrativ; 1.5. është në kundërshtim me ligjin material; 1.6. është rezultat i diskrecionit që është ushtruar në mënyrë jo të ligjshme, apo 1.7. nuk është në pajtim me parimin e proporcionalitetit”.*

Bazuar në konstatimet si më sipër, Kolegji i Këshillit, vlerëson se procedura e pranimit sipas konkursit me numër reference RN00015427, për pozitën e punës *Zëdhënës* në Zyrën e Kryeinspektorit, është e pavlefshme ngase zyrtari kryesor administrativ, gjegjësisht Kryeinspektori i Inspektoratit të Punës për aq kohë sa i njëjti ishte emëruar dhe ka ushtruar pozitën e punës në kundërshtim me dispozitat e aplikuara ligjore të përcaktuara si më lartë, çështje kjo e vërtetuar edhe në të gjitha instancat gjyqësore, ndaj Kolegji Konstaton, se çdo akt administrativ i nxjerrë nga i njëjti është akt i paligjshëm, për rrjedhojë edhe në rrethanat e rastit konkret Vendimi me numër protokolli 2734 i datës 11.10.2024 për iniciimin e apo shpalljen e procedurave të rekrutimit si dhe Vendimi me numër protokolli 3171 i datës 04.12.2024 për themelimin e komisionit të pranimit janë akte të paligjshme.

Andaj, Kolegji i Këshillit, konstaton se Vendimi me numër protokolli 706 i datës 04.04.2025, i U.D Drejtorit Ekzekutiv të Inspektoratit Qendrorë të Punës, është vendim i cili ka vërtetuar drejtë gjendjen faktike, sepse Këshilli i Pavarur Mbikëqyrës për Shërbimin Civil të Kosovës, me Vendimet A.nr.166/2025 të datës 07.03.2025, A.nr.01/2025 të datës 18.02.2025, A.nr.144/2025 të datës 27.02.2025, A.nr.07/2025 të datës 18.02.2025, A.nr.42/2025 të datës 07.03.2025, A.nr.2124/2024 të datës 28.02.2025, A.nr.74/2024 të datës 27.02.2025, ka shpallur të jo të ligjshëm Vendimin 2430 të datës 13.09.2024 për iniciimin e procedurave të rekrutimit për pozitë e lira për Inspektor të Punës në rajonin e Prishtinës me 21 pozita, Rajonin e Mitrovicës me 4 pozita, Rajonin e Pejës me 7 pozita, Rajonin e Prizrenit me 8 pozita, Rajonin e Ferizajt me 7 pozita, Rajonin e Gjilanit me 6 pozita dhe Rajonin e Gjakovës me 7 pozita dhe Vendimin me numër protokolli 3049 të datës 18.11.2024 për themelimin e Komisionit të Pranimit për vlerësimin profesional të kandidatëve për konkurset për Inspektor të Punës në të gjitha Regjionet e Republikës së Kosovës, ku si për pasojë ishin anuluar të gjitha këto procedura rekrutim, rrjedhimisht i njëjti ka vepruar në pajtim me Ligjin Nr.05/L-031 për Procedurën e Përgjithshme Administrative, neni 53 paragrafi 1 dhe 2, neni 55 paragrafi 1 ku përcaktohet se: *“53.1 Një akt administrativ mund të anulohet apo shfuqizohet, sipas detyrës zyrtare, nga organi publik që ka kompetenca të nxjerrë aktin, nga organi i tij mbikëqyrës apo nga një organ tjetër i përcaktuar shprehimisht me ligj; 53.2. Anulimi i një akti administrativ ka pasoja në të kaluarën (retroaktive), ndërsa shfuqizimi i aktit administrativ ka pasoja vetëm në të ardhmen. Anulimi edhe shfuqizimi mund të jenë të pjesshëm apo të tërësishëm; 55.1. Një akt administrativ i paligjshëm për arsye të tjera nga ato ta parapara nga neni 54 i këtij Ligji, mund të anulohet apo të shfuqizohet, me qëllimin për të vendosur ligjshmërinë.*

Andaj, duke qenë se në rastin konkret ekziston gjendja e njëjtë faktike dhe juridike, dhe mbështetur në nenin 8, të Ligjit Nr.05/L-031 për Procedurën e Përgjithshme Administrative, ku përcaktohet se: *1. Veprimet e organeve publike duhet të jenë të parashikueshme dhe të respektojnë pritshmëritë legjitime dhe të arsyeshme të personave. 2. Një veprim administrativ nuk mund të ndryshojë në mënyrë të pajustificuar nga një praktikë administrative e mëparshme e të njëjtit organ për raste të njëjta a të ngjashme;* Kolegji i Këshillit, duke u bazuar në nenin 6 paragrafi 1, nën paragrafi 1.1 si dhe nenin 18 paragrafi 1 nën paragrafi 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, vendosi për refuzimin e ankesës dhe lënien në fuqi të Vendimit me numër protokolli 706 i datës 04.04.2025, të U.D Drejtorit Ekzekutiv të Inspektoratit Qendrorë të Punës, si në dispozitiv të këtij vendimi.

Vendimi hyn në fuqi në ditën e nënshkrimit nga Kryetarja e Kolegjit.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**  
**Lënda me numër A.nr.808/2025**

**Atdhe GASHI**

**Procesmbajtës**

**Malsore GASHI-BAJRAKTARI**

**Kryetare e Kolegjit**

**Vendimi i dërgohet:**

- Përfaqësueses së autorizuar të ankuesit, Valentina Kaçandolli-Bekteshi;
- Njësisë për Menaxhimin e Burimeve Njerëzore në Inspektoratin Qendrorë të Punës;
- Arkivit të KPMSHCK-së.